

Kukkunersuisartut naalagaaffimmit akuerisat Deloittep ulloq unnuarlu paaqqinniffiit pillugit misissueqqissaarnerat nalilersuinerallu 2011-mi nalunaarusianngorlugu saqqummiunneqartoq tunngavigalugu qanoq malitseqartitsinissaq pillugu apeqquteqaat aallaavigalugu oqallinnissamik siunnersuut.

(Inatsisartuni ilaasortat Jane Petersen aamma Debora Kleist, Inuit Ataqatigiit)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

Siullermeerneqarnera

Inatsisartuni ilaasortanut Jane Petersenimut Debora Kleistimullu qujavunga ulloq unnuarlu paaqqinniffiutigit pillugit oqallisissamik taama pingaaruteqartigisumik saqqummiussinerannut.

Meerarpassuit angajoqqaarsianut aamma ulloq unnuarlu paaqqinniffinnut inissinneqartarnerat pillugu isumakuluutisi Naalackersuisut aamma isumakuluutigaat. Ajoraluartumik kisitsisit takutippaat, meeqqat amerlasuut ilaqutariinni isumassuinermik periarfissanillu tunisisinnaanngitsuni peroriartortartut.

Naalackersuisuni meeqqanik sumiginnaanerup inuiaqatigiinni unammilligassaanera isiginngitsuusaanngilarput. Taamaattumik meeqqanut atugassarititaasut pisinnaatitaaffiillu politikkitsinni pingaarnerpaatut inissinneqarsimapput. Aamma pitsanngoriaatit malunnaateqarluartut takutserlugit taamatut ingerlaannassaagut.

Naalackersuisut 2010-mi ataatsimoortumik ineriartortitsinissamut pilersaarummik pilersitsinissaq siunertaralugu ulloq unnuarlu paaqqinniffiit pillugit misissueqqissaarneq nalilersuinerlu aallartippaat, maannalu Deloittep nalunaarusiaani kaammattuutigineqartut arlallit pingaarnersiukkat piviusunngortinniarlugit timitalersuivugut. Timitalersukkat ilaatigut ukuupput:

- ulloq unnuarlu paaqqinniffinnut ataatsimoortumik sullissinissamik neqeroorutit;
- aningaasaqarnikkut inunnillu isumaginninnikkut sullissinermi malunnaateqartumik pitsannguuteqartitsineq;
- meeqqanut, inuusuttunut innarluutilinnullu angerlarsimaffinnut utaqqisut allattorsimaffiannik elektroniskiusumik pilersitsineq;
- pisortanik sulisunillu pikkorissaanissanik neqeroorutit;
- sulisussarsiortarneq sulisullu suliffimmini atugaat pitsaanerulersinniarlugit iliuseqarneq

Naalackersuisuni ulloq unnuarlu angerlarsimaffiit pitsaasumik ineriartornerat, qularutiginnigilluinnarparput aallaavittalu nukittussusaa nuannaarutigaarput. Ulloq unnuarlu angerlarsimaffiit ilisarnaatigaat pisortat sulisullu sulilluartut inuiaqatigiinni inooqataaffigisatsinni navianartorsiornerpaat ilaannut toqqissisimanermik ineriartornissamillu annertuumik iliuseqartut.

Tamatumunngali ilutigitillugu nassuerutigisariaqarparput unammilligassatta ilaat siunissamut ungasinnerusumut unammillertariaqaratsigit. Ilaatigut ulloq unnuarlu paaqqinniffiutitta assigiinngiaarnerusunik amerlanernik inisimasoqalernissaat anguniarlugu aammalu meeqqat inuusuttullu katsorsarneqarnissaminnik pisariaqartitsisut amerligaluttuinnarnerannut atatillugu immikkut ittumik angerlarsimaffinnik pikkoriffeqartunik pilersitsinissarput pisariaqartipparput. Suliassaq angisoorujussuuvoq, kivinniarnedanilu piffissaq annertoq atorneqassalluni. Kisianni suliassaavoq iluarsisassaq, suliassarlu aqqitassatut isigalugu suliaraarput.

Aningaasalersueriaatsit akilersueriaatsillu pillugit apeqqutinut tunngatillugu suliassaqarfiuvoq kommunit aamma ulloq unnuarlu paaqqinniffiit peqatigalugit suli annertunerusumik misissueqqissaarfiullunilu oqaloqatigiissutigineqartussaq.

Ulloq unnuarlu paaqqinniffinni akit assigeeqqissaartinnissaat ajornakusoorpoq, ineqartut pisariaqartitaat aallaavigalugit sulisunut ingerlatsinermullu aningaasartuutit assigiinngisitaartorujussuummata. Naalackersuisut nalilerpaat ulloq unnuarlu paaqqinniffinnut atatillugu akit assigiikkannersut, kisiannili akigitinneqartut ilusaat ersernerluttut. Tamanna pissuteqarpoq kommunit paaqqinniffinnut kommuninit namminersorlutillu paaqqinniffinnut pigineqartunut 100 procentimik akilersuisarnerat, paaqqinniffinnullu Namminersorlutik Oqartussanit pigineqartunut akiliut 50 procentiulluni aammalu kommuninut ataatsimoortumik tapiissutigut 50 procentit utertinneqartarlutik.

Tamatuma kingunerisaanik suleqatigiissitaliortoqarsimavoq, taassumallu ulloq unnuarlu paaqqinniffinni 100 procentimik akiliuteqartalernissap eqqunneqarnerata suliatigut aningaasaqarnikkullu kingunerisassai misissoqqissaartussaavai.

Taamatuttaaq Naalackersuisut ulloq unnuarlu paaqqinniffiit ineriartortinnissaat siunertaralugu inatsiseqarnerup tungaa suliaqarfigaat. Meeqqanut inuusuttunullu ikiorsisarnermut inatsisissatut siunnersuutissami immikkoortortat isumannaallisakkat, pissaanermillu atuisarneq pillugit aalajangersakkat, inuusuttunut inuutsimikkut piuminaatsunut pinerlunniartartunullu inatsisitigut killiliussat, ullutsinnut tulluarsaanissamik siunertaqartut iluarsaateqqitat nutaallu Naalackersuisunit saqqummiutissavagut.

Ulluni 4.-6. juni 2012 KANUKOKA-mit aqqissuunneqartumut Aasianni isumasioqatigiittoqarnissaanut qaaqusaavunga. Isumasioqatigiinnermi ilaatigut Deloittep ulloq unnuarlu angerlasimaffiit pillugit nalunaarusiaa aamma innarluutilinnut tunngasut kommuninut nuunneqarnerat eqqartorneqassapput. Pingaaruteqarpoq kommunillu qanimut pitsaasumillu suleqatigiinnissarput, taamaattumik suleqatigiissutigisatta eqqartueqatigiissutiginnissaannut periarfissap tamatuma atorluarnissaa qilanaaraa.

Naggasiutigalu erseqqissarusuppara meeqqat ilaqutariillu ulorianartorsiortut eqqortumik piffissarlu eqqorlugu ikiorsernerisigit inuuniarnikkut kingornussamik ingerlanerliuutaasumik kipititsinissaq Naalackersuisut politikikkut anguniagarimmassuk. Pingaartumik meeqqanut inuusuttunullu periusissami siusissukkut pitsaaliuinikkullu iliuseqarnikkut meeqqat inuusuttullu angajoqqaarsiani imaluunniit ulloq unnuarlu paaqqinniffinni peroriartortariaqartussat amerlassusaat killilersimaartussaavarput.

Ulloq unnuarlu paaqqinniffiutitta ineriartortinnissaat pillugu oqallilluarnissaq Naalackersuisut qilanaaraat.